

## TITINE

(A l' après dës “*Trifouyaedjes dèl morâlè*” do Dîvin Mârkeu d' Sâde)

### PO S' ATAVLER


L' Comtèsse di Lorsandje - Yèyète k' on lomève kand on l' conèxhève di tot près - avève todi Bén bouté po l' dèyèsse di tos lès ayèssâdjes : Venus. Èle avève branmint d' ièbe d' atire, mins s' ritchèsse duvéve ostant à s' biaté, a sès côps d' rins èt sès rîres, k' a sès chitrîyes po z' arindjî lès omes dins lès grandès laurdjeus. Bronète, ardante èt stokasse, dës lûjants nwârs ouy k' è dijîne long, fwârt Bén toûrnêye, èle avève èto tot c'k'i lî falève è s'tièsse. Faut dîre k' po s' n'èduc èt s'n' instruc èle avève sitî lontimps dins iène dës pus grandes sicoles di Chèrès Seûrs. Avou s' soû, Titine, di trwès ans pus djon.ne, i l' î avève falu viker rèsserêye djusk'a sès kinze ans. On lî avève la fait profité dës lèsons dës pus sinciyeus dës maïsses, on lî avève doné tot c'k'i l'î falève come bons consej èt fé lire tot lès lîves di tot c'k'i gn'avève come bons sicrîjeus. Minme k' èle avève èto polu z-î aprinde à lire li muzike èt sawè è djouwer ossi Bén k' èle si sièrvève di brouches èt d' coleûrs dsus dèl twèle odobèn do papî.

S' popa, dins lès affaires, wangnéve dës caurs pa banslêyes. Mins on djoû il a mau tchwèzi èt stichî sès liards dins ène soce k' arève duvu lî rapwârter co d'pus. Pont tchance por li, c'èst pa bèrwètêyes èt après pa tchèrtêyes k' il a comincî à piède li gros d' sès canses èt cauzu s' ritrover foû d' manôye. Si Bén, k'tôt matén on dimègne ki s' feume èstève à mèsse, après awè ramoncèlé c' ki lî dmèréve co come pîces d' aur muchîyes au pus profond d' sès ridants, il a pèté èvoye à l' ètrandjîr. Dimèrêye tote seûle, lès meûbes vûdîs, l' mame dës deûs bauchèles a tant ploré lès laurmes di s' cwârp k'i n'a nèn falu ratinde lontimps po l' vîre pwartêye dins l' djardin auzès mauvlètes.

Lès Bèguènes n'avîne nèn balziné lontimps nèrén. Èles avîne rade mètu lès deûs soûs à l' uch di leû sinte maujhone.

Yèyète n' s' ènn'avève nèn fait po çoula. Dèdja èle si sintéve fwate asséz èt avou ck'i falève po s' disfinde èt todi awè à mougni à s'fwim. Titine, a pwinne doze ans, tote blonde, dës dints come dës pièles, tote tinre èt lèdjêre, n' s' avève nèn ossi Bén sintu à s'n' auje dins l' monde dës grands. Èle avève manké tchère fwèbe oyant s'soû lî djôzer d' sès prodjèts di s' mète a ranner po trover on ome èt s' fé intèrtènu come ène vijène k' on lî avève cauzé.

– Non.na, dji n' vou nèn viker insi, avève-t-èle dit, l' costri d' nosse moman m'inme Bén. Dji m' va d' aler lî dmander di m' prinde avou lève. – Fyoz come vos l' voloz, boune tchance, lî avève répondu Yèyète tot s' mètant dsus voye...



\*\*\*\*\*6\*\*\*\*\*

**On comache todi...**